

PROGRESSO... FAMILIARE (2)

Nessuno nasce inutile

Al Signor ghe pias a scriv la storia
Che la femm minga num con la nostra boria
Ma l'inventa Lu, con la sua fantasia
E ghe vegn foeura on poema, 'na poesia!
Prima de tutt l'ha scritta in ciel
Che a vedel restom li 'ncantaa, tanto l'è bel
Col So, la Luna e tut'i stell!
Ma per grand ch'el sia 'l firmament
On gran silenzi l'è quel che se sent.
Per trovà 'n quaivun de scambià 'na parola
L'ha vorù creà l'om e la dona.
L'è inscì che con num el scriv la storia
Ch'el m'ha creà per la sua gloria.

Per quest d'inutil vegn al mond nissun

Basta fagom la part ch'el me 'segna a ognun.
L'important l'è de somenàa
On po' de ben e dass de faa
A traficaa i nost talent
Perché del ben ch'avarem faa
A vè perdù propi 'n bel nient
L'è inscì che insem a Lu scrivom la storia
Che la g'avrà in ciel, per semper, el so moment de gloria.

Famiglia e accoglienza

"Ogni fioeu

El vegn al mond col so cavagneu"

L'è on proverbi al'antica
Di noster nonn , di noster mamm
Ch'eren content quand che nascevom
Fusom mascett o fusom tosan.
Lor se fidaven de la Providenza
Che l'arivava giust a la sua scadenza.
Com'eren bej i famili d'ona volta
Quand la roeuda la girava drizza, l'era no storta
E papà e mamm, con noni e parent
De fioeu 'n tiraven su 'na gran brigada
Tant gh'era la cort, gh'era la strada
E stavom alegher, semper content.

Adess la roeuda la s'è girada
E ghe n'han assée de vun o du
E ghe par già de poden pu!

A gh'è persin chi l'ha inventàa
Che 'na mama la se po fitàa!
Tropa fadiga ghe par perfin
De portà 'na maternità
Del principi fin' a la fin!

Per fortuna che gh'è 'nacamò
Chi domà di so 'l se contenta no.
E, ringraziando 'l Signor,
Gh'è chi, con tanto amor,
A ghe fan de mama e papà
A quei che i so gent i han 'bandonàa.

Imparemela, donca, la lezion
Che semm tucc, gram o bon,
Fioeu de Dio, del so amor
E per tucc che vegn al mond
A gh'è on post che speta a ognun
A l'è assée de vegh on coeur
Ch'el se derva a la speranza
Inscì che ognun el g'abbia la sua stanza
E on piat cald per el disnàa
Preparà da mama e papà.

Riflessioni sulla Famiglia (2)

da Don Arnaldo